

Un rat'i ora cu Tanta Dora



Conbai muchanan? Awe mi ta conta boso con antes nos grandinan tabata laba paña. No tabata tin wasmachine. Awendia si nos ta laba paña blanco y e tin un mancha nos ta pon'é den clorox pa e bira blanco, pero antes nos ta usa loke naturalesa ta duna nos. Ora di laba paña blanco ta pon'é prome na habon y e ta bai den e forma aki. Ta lora e paña rondó manera un pandushi y ta hunt'é cu habon blaww cu ta bin na bara largo. Bo mes ta cort'é na e midí cu bo kier, ta laga e pañanan para un dia, un banda di otro den un punchera of tobo, dependé e cantidad di paña cu bo tin. Su manecé ta lab'é y saca ehabon y si e paña ta hopi sushi ta freg'é riba washi (wasbord). Ta manera un borchí cu strepi di largo. Antes e tabata di palo, despues e ta bin trahá di zink y por ultimo di glas. Ora caba ta hawa e paña den awa cu "blows" y ta pon'é na trankera (esey ta un cadushi un banda di otro). Awor nos tin cabuya pa colga paña, y te hasta ni esey, ta "dryer". E tempo aya ta solo cu luna ta haci'é blanco y nos ta bisa cu nos ta pone e paña blikia. Tin paña cu mester di guma y ta cushina e guma cu awa cayente. Ta machik'é prome cu awa friu, caba ta basha e awa cayente aden y ta draai'e cu un cuchara di palo, te ora e kwaha (bira duro).

Nos ta raspa pida bela aden pa e ora e ta cayente. Eseyta pa ora di strika e paña lombra bunita.

Ta haci'é delega cu awa cu un tiki blows aden. Aworaki tin guma den bleki, djies bo ta spuit e riba e paña y bo ta strika, aunke awendia no tin hopi paña cu mester strika, solamente pasa hero, djies pa kita nan doblá.

Si muchanan, awor bida ta mas facil pa un ama di cas, pero toch antes nos ta biba mas contento, aunke nos tin hopi trabao, mi ta corda ora mi mama ta strika, e ta canta di ora cu e cuminsa te ora e caba, pero promé cu cuminsa e ta gloria su curpa, esey kieren e ta haci na nomber di Tata. Muchanan, mi ta desea boso un Pasco grandi yen di bendicion. Te otro biaha cu poder di Dios...


Tanta Dora





Chabalito

Number 6 - Año VI - Afl. 2,=



BIBLIOTECA NACIONAL ARUBA



3 0993 00078 631 9